

Beni Fontana, habitont da Flem, avon la tabla cul cusrin da siu bab Jacob Fontana.



Pign e grond, da Flem e d'ordeifer, en tut 60 personas, ein separticipai alla spassegiada silla senda romontscha.



Tgi che contempla meglier il quac engarta il nuv che quel ha ella lieunga.



Viandonts contemplan ina dallas empremas tablas cun informaziuns dalla historia dil romontsch.



Tgi che pren peda per las informaziuns sillas 24 tablas ei surstauss.



Il secretari dalla LR, Martin Gabriel (dretg), ha rendiu honor alla squadra ch'ha realisau il project: David Flepp, Hanspeter Meiler, Giosch Gartmann, Renata Jäger-Camenisch (da sen.).

FOTOS A. BEELI

3,5 kilometers actifs-attractivs

Inaugurau la nova Senda romontscha a Flem

DAD AUGUSTIN BEELI

■ Dumengia suentermiezgi ei l'aura setratga si ed il sulegl ha splendurau. La dretga tempra per inaugurar la senda linguistica renovada a Flem. Igl onn 1996 haveva la Cuminonza romontscha da Flem (CRF) priu l'iniziativa e schaffu sur il vitg ina senda tematica speciala. Il scolast Gieri Seeli ch'ei morts dacuort ed il pasterner *Hanspeter Meiler* fuvan s'engaschai per quei implont representativ. Cun 26 tablas d'informaziuns han ins vuliu render attent al lungatg oriund da Flem e dil Grischun. Quel ei aunc buc extirpaus e morts, ei dat aunc adina ina tiara romontscha. Rodund 60 habitonts da quella ein s'entupai dumengia suentermiezgi alla staziun a val dalla sutgera. Leu ha il president dalla CRF beneventau els e surdau in bigliet gratuit pil viadi tochen Foppa. Igl anteriur pasterner Hanspeter Meiler ei dapi entgins onns puspei president dalla CRF. El e *Giosch Gartmann* ein stai ils motors ch'han stuschau la vischnaunca da Flem e l'organisaziun Flem Laax Falera Turissem da renovar las tablas.


D'in lungatg che viva

Varga 20 onns han las tablas per liung dalla senda panoramica da Foppa a

Scheia informau dil lungatg e dalla cultura romontscha. Ellas han fatg lur survetsch ed igl ei stau uras da remplazzar ton las informaziuns stampadas sin tablas d'alumini sco era las petgas da lenn. All'inauguraziun da dumengia vardada haveva la CRF spitgau rodund 30 personas, vegnidas ein varga 60. Gliud da tutta vegliadetgna, naven dils pigns cun lur geniturs tochen tier tatts e tats, han tuts vuliu render honor alla senda romontscha renovada. Era il president communal *Adrian Steiger* ed il secretari general dalla Ligia Romontscha (LR) *Martin Gabriel* ein stai presents. Las informaziuns sillas 24 tablas novas ein actualisadas e dattan ina survesta dil lungatg. Sch'ei dat aunc 60'000 ni mo 30'000 Romontschas e Romontschs san ins buc eruir precis. Impurtont ei denton ch'ins sa ch'il lungatg viva aunc adina, quei vul gir ch'ei dat ina scola romontscha, en vitgs e valladas tgiran ins cun premura ils idioms, ei dat medias romontschas, la populaziun drova e tschontscha era il lungatg matern e patern. Quel che s'interesscha sa denton buca mo leger informaziuns, mobein era tedlar co il lungatg tuna, co ei vegn plidau romontsch. Igl onn 1996 havess negin sminau ch'ei dess igl onn 2019 ina

applicaziun speciala sil telefonin culla quala ins sa «tedlar» las tablas. Grazia al code QR ei la senda romontscha da Flem interactiva. Il tierz motor dalla senda renovada ei *David Flepp*. Il collaboratur regional dalla LR ha cussegliu la CRF e coordinau las lavurs culs texts, grafica e tecnica. L'inauguraziun dalla senda panoramica romontscha sut il Crap da Flem ha survegniu in accent special tier la tabla 15. Leu emprend'ins d'enconuscher la canzun dil bau. Da cuminonza han tuts 60 viandonts cantau quella, frestgamein e cun anim. Alla fin dalla spassegiada pacifica han ils da Flem envidau tuts ad in aperitiv a Scheia. El nuegl spazius da *Rico Beeli* han ins saviu far in viva silla senda romontscha da Flem, silla buna collaboraziun e sils sponsurs ch'han possibilitau la renovaziun. Sper la CRF, la LR, la vischnaunca politica e la burgheisa da Flem han era igl Uffeci da cultura dil Grischun e la confederaziun susteniu il project gartegiau.

La Senda romontscha a Flem san ins cumbinar cun ina spassegiada panoramica naven da Foppa a Scheia. Igl access culla sutgera da Flem a Foppa ei adattaus per pign e grond. Ils emprems 300 meters dalla senda ei ina teissa descensiun, perquei vegn cussegliu dad prender festa.



Empurar sch'il telefonin sa leger il code QR. Valentina observa cun atenziun tgei ch'il bab fa.